

居易齋詩存水竹邨人

居易齋詩

水竹邨人題



居易齋詩存自序

蘧伯玉行年五十而知四十九年之非吾今年四十又六此四十五年  
中由童稚至成人讀書家塾射策承明以丁酉拔貢中是科鄉魁  
聯捷成進士當時家道殷實父母鍾愛不知其可樂也庚子後再  
遊京師爲張文達瞿文愼暨今大總統天津徐公所識拔攀附名流  
貴顯可立致願望望然去之負笈西歐經時九載中間徐公掌郵傳  
部督東三省兩次電召回國掉頭而不顧也民國改元徐公薦賢於  
項城任爲府秘書將大用我而我罔聞知也新任和使某請與偕往  
項城雖面許而心實銜之江西事起怨家借端媒蘖二年春解職歸  
遂投置閒散於政事堂機要局國務院秘書廳暨統計局寒暑五易  
目擊洪憲復辟馬廠之變而先君樹三公暨先兄心畬亦於是時先  
後去世家產散盡足無立錫其不餓死者幾希矣歐戰既停漢使首  
途偕赴巴黎和會充駐比秘書白頭趨

幕府杜陵所悲而况一誤而再誤哉九年冬慈母抱病門閭望切  
上書求放歸省視十年夏抵北京今忽忽又將及年矣竊以爲人  
生不過數十春秋而其疾病憂患驚懼傷悼之事恒與賞心快意  
者交互而錯見而古今亂多治少世事每况愈下又往往使一家  
一人之窮通利鈍聚散悲歡與國家之隆替相爲倚伏變而加厲  
焉禹貢九州以外其風物瑰奇其戰爭劇烈東方千年古國其朝  
市變遷其紀綱隳廢盱衡當代徯徊身世歲月逼人功名不立其  
間又不無急難危疑愛憎恩仇睚眦擲揄兢兢幾先明哲未免悠  
悠天道是非何云而慷慨激昂悲憤不平之氣遂乃沈鬱頓挫盡  
發之於詩歌殆所謂有激則鳴窮愁後工者歟太史公曰詩三百  
篇大抵賢聖發憤之所爲作此人皆意有所鬱結不得通其道故  
述往事思來者於是卒迹陶唐以來至於麟止杜陵做史記列傳  
體而變爲韻語作八哀詩傷時盜賊未息興起王公李公歎舊懷

賢終於張相國而復殿以壯遊一篇以自序其生平所經歷志誠不才而承家難遭時艱鬱結不通懷往傷時誠有不能已於言者十年歸自比檢行篋得若干首顧遷史自謂成一家之言而杜詩亦謂自我一家則吾敢上擬古人乎然語云亂世之音怨以怒亡國之音哀以思蓋古今有國家者莫不隨治化良窳習尙異同士氣舒慘而各有其俗謠民謳飲食作息晤言歌哭感於時移於地動乎人心發爲天籟若泉達火然草木春萌不可遏抑而亦不能矯飾而造作之然則是篇靳氏之詩抑亦清代季年民國初造之詩也後之覘國探風者或於此有取焉民國十一年四月七日大梁靳志自序



居易齋詩存卷一

大梁靳志

民國改元前舊作

光緒庚子遊鳳翔過函谷關題店壁

弱歲讀書破萬卷下迨近世上軒義閉門造車出合轍致遠每欲  
絕塵馳君不見終軍班超傅介子立功海外是男兒莽蕩大陸黃  
塵起出門搔首欲何之河洛西上通關輔姬周肇興鳳鳴岐漢氏  
文物炳西京鐘鼎斑駁生蛟螭東坡裁判鳳翔郡有書召我東湖  
湄妻舅張季理編脩署鳳翔知府仗策辭家出虎牢時先君樹三  
公教授孟津眷口隨侍函谷狹隘路傾欹地瘠水涸草木死風急  
沙重車行遲強秦扼險鞭天下山東諸侯奔走疲我欲弔古無遺  
老秦關月落鷄鳴時胡塵蔽天燕京燼六龍西去掩旌旗東南財  
賦甲天下徵求轉輸有鞭笞天寒雨雪道路苦人馬僵臥山之陂

扈從貴官皆溫飽那知溝壑有窮黎西望太華風雲惡三年不雨  
民苦饑秦川千里地皆赤村落丘墟無子遺是年兩宮駐蹕長安  
值陝省旱饑人民流亡城村多空我愛衆生莫能助我亦流落在  
天涯吁嗟乎函關已圯尹喜死紫氣東來不可知

乙巳初至巴黎

漢使探河源孔父居九夷仙山在縹緲洋海多瑰奇天外有人事  
桑麻聞犬鷄宮闕鬱崔巍甲第夾道馳市廛羅百珍往來何攘熙  
絃歌被里巷百年靜鼓鼙士女慧且靚習禮亦明詩嬌笑接遠人  
溫雅有文儀百越資章甫喟然吾道西

民國改元返自英倫

上國天驕子負笈海西遊喃喃學齊語九見莊嶽秋越音莊烏吟  
異地山公樓雖云此間樂思蜀令人愁周道今板蕩橫潰見神州  
謝公東山日思起挽狂流北風吹胡雪代馬聲啾啾一朝挂帆去



東渡歸故丘

六年居北京東皇城根作

六年春唐俊夫少將營新居於大草廠借予舍後餘地瓦屋  
十餘椽另在東皇城根闢門疊石成山藝花開徑頗自適  
也四疊韵示孟仁

京華冠蓋滿人事日推移身世餘雙鬢風塵借一枝恨隨春草長  
花共美人遲車轍門前少晴窗讀杜詩

四年客京國館舍四回移往事東流水浮名駢拇枝舊藏書失盡  
新種樹生遲濁酒澆難去閒愁總入詩

疊石峯巒起開窗月影移紅添芍藥圃綠壓海棠枝小院留春久  
良宵入睡遲朝來聞鶻噪爲報有新詩

亂世閒居好中年客興移雜花帶長砌老樹被新枝事簡書還讀  
牆高月上遲故人時過我尊酒可論詩

夏夜再疊前韻

對花興不淺就月坐頻移綠接鶯藏葉低垂子亞枝醉沈千日少  
夢醒廿年遲終是有仙骨高吟巢父詩

秋涼仍疊前韻

此地經春夏秋來景物移草枯山有骨葉落樹添枝日暖嫌窗小  
宵長覺漏遲華年容易了猶臆菊花詩

客意轉蕭瑟傷哉物候移天清霜入鬢風動葉辭枝野菊秋開早  
高空雁度遲坐看芳草歇寂歷北門詩

答金孟仁見贈

深巷不廻長者車小園一畝足烟霞惟君舊雨來今雨到處爲家  
豈是家嬌女生成無俗韻甥女周穎莫愁猶似半開花玉如書生  
未有封侯相也向青門學種瓜

夏夜與孟仁暨穎甥聯句

月白風清夜仲談瀛客未休不妨花睡去孟欲借酒澆愁詩思年

來苦仲心情物外遊中原長帶甲孟異地獨登樓仲風送鐘聲遠

穎歌殘玉樹秋孟家書烽火隔往事大河流穎阮籍窮途淚仲師

陽入海舟已聞傳市虎孟生怕缺金甌寶劍餘三尺仲朝臣鑄九

州知交今落落穎人事日悠悠幸有園亭好莫懷千歲憂仲詩成

再三歎與子結綢繆穎

### 秋夜與穎甥暨孟仁聯句

秋風瑟瑟木葉黃穎寒蟿啁晰鳴東廂有客過我夜未央仲重幃

深下華燈光我所思兮天一方孟牽牛織女限河梁兵戈滿地道

路長青鳥信杳空斷腸穎有家未歸淚霑裳有志未酬鬢已霜仲

百世悠悠曷有常蓬萊水淺滄已桑孟胡爲鬱鬱久他鄉我欲奮

飛驂龍翔穎薄寒中人夜色涼仰看三五正縱橫仲驚才風逸屬

謝娘清詞麗句皆琳琅孟高歌夜半氣愈狂主人有酒勸客嘗仲

莫辭一醉累十觴孟今夕良會不可忘穎

贈法國人鐸爾孟並喜梁燕蓀遇赦

西方有君子懷抱瓊與璠東游震旦國遠涉黃河源季札觀於魯  
欲窺大道源被服聖人教頗悅儒者言論詩喜魏晉讀史窮軒轅  
下幃歲月改幾見春風暄遭際清明時侍從項城袁梁公敬好客  
客至如雲屯謙恭古人風感激國士恩時予在鳳池識君金馬門  
遊園興匪淺尊酒文細論陽九有迺遭龍戰大陸昏驚心宮車晚  
愴懷洄上村翩翩魏公子灑淚乃出奔秋水滿江湖鴻雁渺無垠  
一昨有恩詔逐客返故園河山猶未改三徑松菊存新年東風至  
京洛春色繁世人貴蕭艾我獨愛芳蓀作詩告故人共招楚客魂  
孟仁以迷途詩見示次韵酬之

今知四十一年非生是行人死是歸入世三逢瀛海淺出門日見  
白雲飛已將周道鞠爲草何處西山可採薇爭耐元規塵太惡與

君共惜芰荷衣

爲人題鴻雪圖

胡雪千山白西風鴻雁秋鴻飛向寥廓雪跡片時留來去今生證  
言詮意外求世人迷色相未許畫中遊

六年中秋

豈是文章老更成窮愁天假以詩鳴風塵京洛素衣染郎署簿書  
白髮生秋色又霑原上草月華不減舊時明那能盡掃浮雲去留  
得嫦娥永夜清

公園夜坐

久坐驚秋至長吟欲夜闌隔花人語近穿樹月光寒

重陽後十日大風竟夕籬菊盡枯適孟仁自粵來書索近作  
書此報之

昨夜嚴寒至朝來庭樹空尤憐三徑菊都付九秋風霜草冰花白

俚人爐火紅梅開先嶺上折寄帝城東

青春一去無還時留得秋容好護持昨夜北風入庭院摧殘又到  
傲霜枝

秋夜遊公園

社稷壇接午門樓社稷不存壇自留輦道已埋吳地草月華猶照  
漢宮秋雙雙遊女招紅袖瑟瑟蘆花盡白頭欲問元明清日事御  
溝橋下水東流

重陽前一日種菊

年過四十文章老節近重陽風雨多種菊日應看萬遍秋花雖好  
易蹉跎

重陽前三日與孟仁暨穎甥聯句

落葉滿庭院穎開門來故人客言病未已仲意態難具陳瞻彼晨  
風飛孟憂心感離羣清秋墜霜露穎高歌來鬼神久宦亦云拙苦

吟一何勤仲豈必慕神仙儔侶懷所親孟重九天氣佳野外黃花  
新尋山不覺遠仲登高及良辰孟杖頭百錢盡有酒不爲貧仲愛  
此晚節香凌霜保其真穎採之遺所思道遠致無因仲俯視蒼波  
水仰觀晴空雲穎雲水倏西馳眇茲百年身仲

薄宦

少年不信儒冠誤射策常懷國士風意氣那堪當道用功名羞與  
世人同年過強仕宦猶拙命到窮愁詩亦工負郭無田歸未得天  
寒雨雪汴城東

舊遊

五年匏繫爲微祿九日菊開非舊遊海上三山仙子駐梁王古國  
大河流春風結騎尋伊洛夜月乘槎犯斗牛懷有尺書字磨滅故  
鄉絕域兩悠悠  
是非

卷一  
五  
是是非非昨與今風塵知遇感猶深偶逢佳士留青眼且喜紅顏  
有素心小苑花開春正好南樓夜迴月長臨五年爲洗窮途淚一  
寸相思一寸金

愁

未還酒債兼詩債無限新愁續舊愁老尙爲郎今臥病貧長作客  
又逢秋黃金欲賣相如賦暇日來登謝眺樓回首春明廿年事文  
章詔試鳳池頭

西南

西南王氣那能厭東北風雲今正稠家破仲宣悲去國將非李廣  
盡封侯勞生已散萬金產亂世空懷千歲憂一曲後庭陳後主可  
憐京洛出名謳寒雲在言樂社演大地河山

殘局

霜風昨日度江洲葉下庭梧入早秋誰把黃金市駿骨獨尋明月



上南樓將軍老去猶思趙正朔於今豈奉周錯鑄九州因一子可  
憐殘局不能收

家居

入眼滔滔東逝波新秋風雨奈愁何誰談時事聞鷄舞且共家人  
拊缶歌朝內知交豈爲少醉中詩句不嫌多已拚世與我相棄莫  
怪門前有雀羅

詩酒

自古銷憂無若酒人生失意且吟詩况逢秋雨菊開日最愛霜林  
月上時每以閒情牽舊恨誰從薄俗覓新知如泥爛醉歸家去應  
笑山公倒接籬

朱鐵林太夫人七旬壽詩二十韵

大梁天下中風土異南北河嶽毓秀氣賢聖昔輩出農民多墜樸  
終歲事黍稷寂寞隴畝中往往有奇特朱家世寒素躬耕食其力

大道在勤儉時命無通塞賢母良家子來歸宜家室既耕亦既讀  
課子每日昃天津徐傅相篤舊饒令德提携故人子置之君子國  
交情堅金石鸞鳳生羽翼版輿迎京師顯揚及此日庭前雙玉樹  
太夫人手植長筵列孫子桂與蘭繞膝萱草茂北堂庭戶生顏色  
瑤池春風永蟠桃三結實獻觴稱萬壽懼一而喜一既富不忘貧  
昔勞今永逸堅卓松筠姿母儀鄉黨式我獻南山詩愧無凌雲筆

南國

南國有佳人冰肌玉爲胎宜笑又宜嗔亭亭美身材崩雲鬢遮額  
宮錦時樣裁纖手撫素琴音響一何哀曲哀不能終推琴起徘徊  
香沈金鑱鼎奩掩玉鏡臺春色滿庭院朝曦霧初開東風送微雨  
香塵濕青苔林花開復落行人猶未回

六年二月二十五日卜居東皇城根明年二月二十四日適

爲清明蓋居此者一年矣寄懷金孟仁並示甥女周穎穎

曾從孟仁學爲詩也

自我來京師五見清明節春來增惆悵春去還相惜今年春歸早  
頭比去年白晨起聞鳥喧開門花如雪屋角明朝曦笑迎幽棲客  
繞樹蜂蝶亂當階草芽出愁與春共長柳絲長不折今日去年時  
移家掖垣北勞生未云已一枝且偃息開徑樹低亞疊石山欹側  
澆花夜來雨窺窗雲中月金生性孤高懷刺字磨滅獨愛范野人  
過訪朝復夕新炊甘藜藿清談霏玉屑我家有嬌女問字每前席  
往往有佳句詞意兩清絕我本傷心人清興爲爾發明月中秋夜  
風雨重陽日抗懷建安初古人若可接安得大雅作朱絃疏以越  
窮途多悲音不惜唾壺缺曲終繼以淚起視星河沒舊遊在何許  
飄忽歲月隔南浦春水波又見春草碧歸燕識故巢官柳黃金色  
落落眼中人東風長安陌荏苒清時徂坐愁紅芳歇

秋至書懷呈徐東海

今歲久苦暑七月猶炎曦京華名利場往來攘熙時世人皆趨熱  
而我與世遺客心方飲冰獨與秋相宜秋風來何暮望汝渴與饑  
昨來一夜雨芰荷落古陂西風吹逸興飛在山之湄秋花艷且明  
秋雲淡亦奇晴空清不盡綠草秋更滋忽憶少年日會與佳人期  
意氣在霄漢臭味蘭與芝陽春弄光景卓犖美容儀兩從江海遊  
來歸鬢如絲中原今橫潰世路復嶮巇衆口鑠黃金曾參母亦疑  
我擬哭途窮時還悲路歧駿馬金絲絡羞逐長安兒愚哉魯國女  
乃獨惜園葵忽忽蕙艸晚軒車來何遲流水日潺湲紅蓼漸離披  
秋虫鳴不已舊事欲告誰去去勿復道且向高陽池

附金孟仁酬秋至一首

白露初降秋氣清夏蟬已變秋蟬聲支頤冥想苦寂寞眼前  
忽見雙魚橫魚中尺素有佳句道着麻姑搔癢處君自悲秋  
我亦悲秋將悲來不將去春夏秋冬四時行秦皇漢武在何

住山木自寇膏自煎惟有虛無是歸路歲歲年年城上草植  
根雖高畏風早萬物循環各有時疏而不失見天道伯倫頌  
酒以酒全士衡聞鶴悲洛川棄置進取吾何就材不材間全  
其天嗚呼世道久淪喪肢篋穿愈盡人望勸君莫羞絳灌伍  
妻孥那忍凍餒苦

七年十一月既望將隨使赴歐參戰處僚友公餞酣醉倒臥  
大吐同人衣履盡汗夜半酒醒口占柬示諸同人

丈夫弧矢志遠與四海期隨槎八月去西渡河源西龍性馴不得  
鸞羽鍛有時一從汗漫遊匏落悲樊籬冷署簿書少閒散與我宜  
賢哉二三子愛我不相遺酒肆遍長安皆我習氏池每飲輒共醉  
坐視白日移偶與長風會又向西陲殷勤故人意越鳥惜南枝  
祖道東門外高歌渭城詩今夕欲盡歡巨觴何淋漓酩酊倒載歸  
山公醉如泥怒殺買臣妻笑殺襄陽兒人生不滿百後會知有誰

明日隔山海我忽天之涯酒痕在襟袖猶得繫君思  
七年赴歐在太平洋暨大西洋舟上作

自橫濱東向海行入西半球

跨海向東去行行日向西舟遲疑月走水遠覺天低白浪奔羣馬  
朝霞動曙鷄長風吹不斷方丈接丹梯

太平洋舟上

巨鱗思大壑鯤鵬宜天池昂藏四海志蹭蹬歧路悲浮槎海上來  
仗策與家辭萬里胸懷壯水國風物奇雷雨破空來白浪與天齊  
萬竅天風號日夜魚龍馳舟行破巨浪劃然開地維機巧奪造化  
么麼笑馮夷出海日月近瞰人星斗低蓬萊遙在望樓閣光陸離  
仙人笑迎我子喬與安期身騎雙白龍凌波步威遲萬象森在旁  
使我心神迷

自橫濱東向海行旬日始見檀香山羣島

海行十餘日惟見天與水遠天不到頭大水日渺瀰水天同一色  
蔚藍空明裏今朝忽有山行客相告喜隱約遠初見迤邐漸可視  
綿亘橫水長合沓蠹天起猶疑水上雲垂天恣奇詭雲散山自在  
壁削峭然止入水日如輪射天霞成綺漸合碧雲暗猶橫暮山紫  
此中有人世板屋依城雉島民無春秋四時花爲市貿易閭閻殷  
絃歌風俗美詰朝艤舟入半日征塵洗更當挂風帆行邁未云已  
舟次檀香山伍芷菴李叔騰兩領事欸待甚周作詩謝之

晨起觀日出半輪猶在水飲海長虹壯燒天朱霞駛海風送行舟  
凌波去如矢遠山向人來港汊自此始山水遙接處時有白雲起  
瀰漫忽滿天山在白雲裏上岸遇故人具道風物美世外桃花源  
四時羅嘉卉有棗大如瓜有魚皆頰尾主稱會面難空谷足音喜  
斗酒舊家藏春甕浮綠蠹故鄉風味好十觴未能已歡娛願未終  
驪歌忽在耳別後寄新詩付之雙文鯉

戊午十月既望初發北京時殘月將沒由滬泛海東行夜夜  
船面望月越二十餘日猶在太平洋面及抵金山又恰值

月圓也

一別北京月浮槎入海天晦明流芳歇盈缺歲時遷長崎見新月  
一鈎何娟娟東過三山去看汝初上弦檀香有福地花月十洲仙  
再東碧海闊空水相澄鮮前路望金山美陸氣候偏波濤堆琉璃  
雲歛天無烟三五影又滿團圞光愈妍感此懷遠人惜別淚如泉  
家山日以遠海上得月先萬里隨我來清輝欲滿船北京今夜月  
今夜未應圓

舟至金山

金山東海東萬里望超忽兼旬破浪行長途無終極忽聞明朝至  
喜語若報捷想像巖壑美夜半未交睫夢裡繫纜去登岸愜所適  
驚醒覺舟停窗外天光白起視溟漲闊半輪猶浸月夜色辨遠山



星影搖空碧霜露濕人衣久立寒侵骨一縷散朝霞鷄鳴動海色  
紅日出海大倏忽半天赤堯兀見鳥嶼青翠多松柏隱隱炊烟起  
熒熒燈火沒金門開兩扇相對立青壁艤舟入港口帆檣密如鯽  
却顧所來徑渺茫入溟渤

先王石孫十餘日赴歐然以在紐約候船八日仍與石孫同

船渡大西洋石孫以七律三章見示頗有身世之感次韵

三首

家住蓬萊十二洲塵寰墮落幾經秋白頭已分低垂死碧海偶爲  
汗漫遊大禮三章獻明主長風萬里送行舟與人爭席經時久應  
許入羣耦白鷗

夜光杯泛綠蒲萄風送樓船雪浪高每欲此身將酒隱還欣海上  
遇詩豪情懷綺麗廻文錦意態奔騰八月濤自是使君有仙骨效  
顰西子亦何勞

奇才磊落未能申四十買臣行負薪海外知交今遇舊囊中詩句  
日翻新文章待價豈云命桃李無言獨自春我與王郎同格調由  
來冷熱不因人

大西洋上效王石孫體並用原韻

客顏如雪柏風雨日將夕帆影向空沒水與天同碧  
偃蹇歲寒柏蕭颯海天夕返照散殷紅孤帆投遠碧

舟中同行者爲徐子璋王石孫陳補樓子璋最豪於酒志次

之石孫略飲酒而特豪於詩補樓則喜看詩而絕口不飲  
酒每飯必設酒盡壺而止更闌酒醒往往不能成眠吟哦  
達旦及披衣起有詩獻於諸君子矣再疊石孫韻

自從西域進蒲萄驟使長安酒價高聞說壺中藏日月由來醉裡  
識英豪池塘夢醒春生草湖海秋深夜有濤莫惜千金裘換飲風  
塵王事獨賢勞

十二月朔舟次英國利物浦大霧不能傍岸

東指利物浦舟去如鳴鏑島嶼迎面來帆檣破水出明滅旋塔燈  
起落亂鷹鷂前路無百里嫣然笑行客從此解征帆傷哉久行役  
天公有愁容大霧忽充塞萬象失所在水天同一白海色暮轉深  
四顧烟雲黑對面聞人聲咫尺不相覩暫爲收風帆高歌待明發

The image shows a large rectangular frame with a thick black border. Inside the frame, there are several vertical lines that create a grid-like structure, similar to a ledger or a table. The lines are evenly spaced and run from the top to the bottom of the frame. The background within the frame is white, and the overall appearance is that of a blank page from a traditional Chinese manuscript or ledger.

居易齋詩存卷二

大梁靳志

八年初到北京作

讀汪袞甫哀王慕陶詩有感用原韻

王慕陶字侃叔於五大臣考察政治時來比以善爲文機  
警爲李穆齋公使所識拔因緣辦黃報及遠東通信社王  
法語甚淺陋報社主筆一仗洋員當時巨公不知底蘊驚  
爲絕世才中央暨各省輦金相濟故自考察憲政泊於歐  
戰未及十載而王積產至百萬法幣王縮衣節食錙銖必  
較娶比國貧家女御之嚴每以不給予遺產恐嚇之死於  
瑞士不及爲遺囑比婦夤緣承繼今居然百萬富人矣王  
爲人忌刻陰險每中傷人而人不知也民國二次革命王  
暗唆學生滋事捏造駐和比兩使館電報陰謀既行匆遽

返國而西伯利亞途中又適遇雲臺大公子潛進誹語一  
舉而兩公使三秘書去職蓋王意在自得比使及部令出  
不過駐比二等秘書甚怏怏也將死時性情驟變欲盡去  
所有以緩須臾勿死自爲詩云寂寞園亭冬已暮清涼肝  
肺熱全消而汪使原唱亦有斷句都成變徵音之句也

此身自是有升沈因果循環寄意深奔踣傷羣真害馬辛勤作嫁  
誤機心儉家何用多金累哀鳥空聞將死音我與使君萍水接無  
端恩怨苦追尋

歐戰之明年隨使來比春寒不解憶北京舊居

漢使駐節地高在雲水涯名園帶古木傑閣出簷牙何年潼關破  
驚心漁陽擲鐵騎入王城六龍走驚蛇宮闕汗腥羶衣冠投荒遐  
我來兵戈後閉門閉官衙痛定瘡痍在時窮飯量加比國殘破之

餘物價奇漲歐戰前尋常一飯一兩佛郎者今須廿餘同事王德

炎食量大每餐三十餘佛郎尙未能飽呼人理荒穢闢徑鋪白沙  
啓扉露清曠披榛見槎枒前夜東風來向晨日透紗淑氣活地脈  
殘冰消水窪時聞好鳥聲初見桃李花誰知節序愆冰霰春紛拏  
連月不見日慘慄森鏤鄒卷施死苦心芍藥萎新芽何如北京好  
掖門吏隱差江北地氣晚夏初見春華百卉與時新當窗如流霞  
佳人閒相過深巷迴錦車故鄉今何若回首空怨嗟

三月初接家書言穎甥受鄧君壽估聘將於望後于歸歐戰  
後郵遞遲緩五十餘日始達北京計穎見此詩已過吉期  
也

汝爲名門女卓犖有奇姿十五弄柔翰觀光來京師海外飛鳥還  
素衣風塵欺還讀舊時書析異共賞奇抗懷託鸞鳳欲棲梧桐枝  
長安多輕薄曲高和者誰我行又向西客冬與汝辭相送城東門  
愴然渭陽詩雙鯉有尺素良媒前致詞佳人嗟信脩君子仰光儀

讀罷百感集不知喜與悲喜汝身有託悲我長別離我有一札書  
寄汝黃河湄上言長相憶下言會面期那知終參商素絲與路歧  
別來如昨日海上東風吹良辰及暮春夭桃正葳蕤堂前雙飛燕  
相愛莫相疑

贈朱貫微時在巴黎參與和會

我有尺素書因風遙寄君書短意自長迹疏情仍親中原方擾攘  
策辯據要津可有魯仲連談笑却秦軍未雪會稽耻志士空悲辛  
匿迹遊下邳子房豈忘秦可惜舉國狂無人和陽春三逐非不肖  
取多知管貧翟公去廷尉雀羅設其門善宦遍天下善交有幾人  
徒令昂藏士掉頭甘隱淪所以劉孝標是非細推論感君富意氣  
慷慨古道存國士重知己不爲怨與恩

家中舊有藏書

志

幼年尤喜搜集壬寅北遊京師取半自隨

及遊學赴歐則寄存於今大總統天津徐公北池子廡所



中間徐公出督東三省退居林下鮮有定居民國改元志  
歸自海外問所寄存書籍散失盡矣適家亦中落汴省舊  
居質於人先君樹三公教授孟津官舍湫溢餘書尙百千  
卷無處庋閣委棄篋笥二年隨使赴海牙携以自隨海外  
多暇仕優念學深望時還讀我書也然家中厯世所藏其  
存者只此矣三年放歸旋值歐戰郵便阻絕書箱仍留海  
牙使署而京寓乃無一卷不得已則向友人借閱或購坊  
本六年春有詩云舊藏書失盡蓋傷之也八年隨使來比  
甫下車即寓書駐和唐使問書尙在否旬月書至縑緗無  
損丹鉛如新離亂經年故舊生還執手歎歎悲喜交集矣  
吾家大梁城四世皆爲懦弱齡愛書史閉門耕菑畬網羅新舊聞  
百城起座隅海外更九州重譯方言殊一物儒者耻新異每起予  
象形蒼頡篆諧聲旁行書負笈去禹域九見草榮枯歸來朝市改

兵戈硯田蕪萬卷寄王粲漢獻興平初播遷亂離後人去書與俱  
我家遭中落負郭居無廬編散章已絕塵埋生蠹魚檢點置行篋  
乘槎訪蓬壺載與吾道西下帷歲其除一年席未煖解組放江湖  
龍戰昏大陸豺虎塞通衢昔與書偕往不得同歸與自分成永訣  
灰燼秦火餘豈知斯文在真有鬼物扶戎馬經歲年臺傾城爲墟  
訪舊披荊榛弔死問里閭古文出孔壁字字青珊瑚百家逮九流  
星緯雜典謨漢魏揚清波齊梁華而腴點勘秘閣本瀏覽山海圖  
下車如昨日東園桃李舒水木含清華圓缺望蟾蜍讀書以卒歲  
長此爲歡娛

海外晚春

客裏長惜春海外春不歸連月苦陰雨清明雪霏霏豈因地氣冷  
無奈物候非四月入首夏始見裁春衣天晴衆鳥喧日出朝露晞  
新柳半黃綠欣欣生光輝野花遍地開風光動草微雙燕過牆來

故故傍人飛似曾巢君屋故園念芳菲故園春應暮綠滿紅欲稀  
聞巴黎和會失敗

魯連一語却秦軍排人之難解人紛功成辭賞拂衣去亮節清風  
千載聞秦并六國韓不祀子房破產求力士博浪擊椎祖龍驚下  
邳借箸漢業起布衣那願爲帝師去去從遊赤松子漢世衛霍貪  
天功廝養皂隸皆侯封匈奴未破無家爲大將風姿猶英雄諸公  
意氣陵儕輩冠劍我我黃華使爭請長纓繫南越攫取功名如拾  
芥事變忽來倒山丘趙趙囁嚅無一籌百里日蹙邦家瘁九鼎足  
折壇坫羞封豕長蛇食上都江黃息鄧半爲魚摧抑強暴扶弱小  
城濮召陵空霸圖句踐羈棲會稽上祖逖擊楫誓江浪未報強吳  
食不甘必清中原氣悲壯先王禮樂在東魯青徐山河皆北向破  
空風雨下雷霆大地雲霾暗使星未有相如歸楚璧更無包胥哭  
秦廷春秋直筆那能諱功過分明照汗青

春日即事

地偏春自晚綠滿陰猶稀東風散清和晨光動熹微逍遙步東園  
身輕換袷衣深林市聲遠觀物得天機片雲起天末半園曖日暉  
殷殷雷聲動急雨密如絲春雨異秋霖潤物發華滋雨過天愈青  
樹色濕更輝風物方駘蕩離情怨芳菲中原佳麗地河山今是非

官舍東園

海外爲吏隱簿書日填委幸有官舍幽名園林木美千章散餘清  
我忘居近市市聲林外遠殷雷在百里身世多悲歡人物互臧否  
東風吹白雲情懷今若此心遠地自偏妙契淵明旨好鳥時窺人  
飛鳴去還止靜聞林花落坐視崩波駛

東園獨坐

駘蕩海外春清幽雲林境碧草如錦茵偃臥盡晝永向夕飛鳥還  
半壁下日景漸漸暮色合蒼蒼樹木迴遠天散炊烟穿林搖星影

暗中聞花香坐久知夜靜遲遲上新月清光照衣冷何處撫素琴  
鄰火隔牆炯曲中如有怨不寐心憂耿

隨使駐比租屋將迎眷口

蒼梧有白雲飛入大梁城隨風過瀛海幾度駭浪驚那知明年事  
三年或瓜更官舍如傳舍此生眞浮生卜居傍林木日出烏雀鳴  
鬱陶鄉國夢駘蕩春風情

客冬去燕京離情不可道近爲數月期來會及春早清明桃李開  
東風吹百草幾回望圓舒夜夜青天皎更漏隨夢遲霽色虛窗曉  
披衣步東園紅稀綠陰遶

感時

夙有澄清志情懷今若何天涯知己少海外落花多家破藏書在  
詩成歲月過中原尙無象可惜古山河

遲眷不至中夜望月

南樓月再明佳人猶未至清光入我窗識我相思意萬里隨征人  
夜夜海天際我欲問嫦娥孤舟今何地

八年夏赴巴黎作

再過法比戰場

強秦務兼并六國攻守同五年兵禍結萬里機杼空虎狼秦斃矣  
衰竭天下窮驅車古戰場冰雪值嚴冬滿眼瓦與礫名城化爲烽  
饑鳥下取食溝瘠塵未封煩冤見新鬼癘疫隨荒凶再來春夏交  
蓬蒿沒行蹤草色連天碧故壘來悲風野花遍地開猶疑戰血紅  
漸有流亡歸板築無垣墉而况缺牛馬胼胝苦力農瘡痍那易合  
痛定痛五中生聚百年事天命會有終久戰元氣傷霸圖空爲雄  
方知兵猶火自焚悲元兇

唐俊夫少將夫人金釧銘

粲粲雙南金鑄爲合歡釧釧圓無缺時金堅不可變

張默君女士以所詠巴黎鐵塔暨拿破崙墓各二首見示次

其韻

賽因河上塔凌空五載支撐烽火中誰道孤高風雨烈歸然長倚  
夕陽紅

霸國之餘自壯猷我來登塔雨初收河山氣欲東南盡天漢聲聞  
西北流

百歲之中爭戰頻乾坤宰割豈伊人重瞳蓋世終垓下漢武開疆  
敝庶民

投鞭直欲斷長流島國原來是舊仇錯鑄九州英法惡宮車晚出  
海天秋

題朱貫微代使癸卯中副榜紀念冊

有清三百載經義起生民板蕩迨同光吾衰未能陳及見掄材典  
我生豈不辰鄉舉歲丁酉戊戌觀國賓金馬一蹭蹬滄海起胡塵

青衿困泥塗乘輿清渭濱癸卯甲辰際東都日再春此後斯文喪  
學子空莘莘朱侯昂藏士華藻耀青旻誰使誤副車龍門阻巨鱗  
杜甫三上賦李斯初適秦去去且投筆浮槎天漢津兼通旁行書  
方言搜異聞壇坫發光氣瑰麗琳與珉五經顧茂獻未忘香火因  
閒尋茂陵稿縑素墨尙新悽愴開寶事零落集賢人

文章遭際本難知折得蟾宮桂半枝滄海重談清掌故東都空見  
漢官儀癸卯京兆試於西安迴鑾後第一次舉行然已改制藝爲

策論甲辰後並此廢絕茂陵何意留遺稿雪苑當年未遇時今日

浮槎三萬里且將班筆寫新詩

七夕顧少川公使華餐召飲在座者爲胡馨吾夫人王劼甫

叔太夫人唐質甫唐俊夫沈伯英夫人張默君女士多能

操英法語然均爲中國裝束方言蠻語不作秦聲而環佩

明璫猶存漢舊酒酣張女士命志作詩紀盛



華堂劍佩新邀寵西域蒲萄初潑醅座客不辭金谷數主人本是

少年才洞庭張樂湘靈舞

唐中將夫人新學跳舞

天漢浮槎織女

來

唐少將夫人新至自中國

俊夫先來已六越月

尤喜瑤琴能解

慍

唐少將夫人飯後用鋼琴奏三六之曲

大千花雨笑顏開

漢宮月下降王母羣玉山頭會衆仙爲有長才使絕國常教高燭  
照華筵生花我愧江郎少詠絮今聞謝女賢太史詰朝應有奏客  
星欲近斗牛邊

花萼樓頭月欲波花萼樓中酣且歌主人年少早鳴珂玉樹臨風  
生枝柯長纓南越繫尉佗華堂錦席來青娥海外珍羞膾銀鵝蒲  
萄酒滿金叵羅美人未醉顏先酡燭光鬢影搖青螺再隨使槎上  
黃河嗟我四十髮已皤故鄉風味今若何蒹葭鱸魚秋風過且喜  
海內息干戈壇坵日煖奏雲和蓬萊織女停金梭雲車下降錦駱  
駝謝氏阿嬌出水荷古錦囊中佳句多拈花笑聽我吟哦下里絲

竹無譴呵嗚呼青衫司馬其蹉跎

徐子璋豪飲唐質甫中將筵上與志賭勝每得詩一首飲酒

兩杯即席口占十絕

今夕復何夕春風拂綺筵還聞詩有債安得酒如泉  
一斗詩百篇才名萬古傳生來有仙骨惟見李青蓮  
妙絕清平調青蓮醉後詩名花如解意含笑倚欄時  
力士親磨墨宮人笑擘箋從知詩亦聖豈但酒中仙  
高歌還餓死痛飲是吾師詩卷留天地浮名當世知  
我豈東蒙客君原舊酒徒相逢方一笑既醉更提壺  
鸚鵡禰衡賦揮毫若有神文成不加點字字欲驚人  
盛事真難再佳人遇有期仙家千日酒蘇李五言詩  
詩興來無已良宵欲醉時薄醪隨處有佳句喜人知  
欲借詩言志還須酒破愁今宵明月好扶醉上南樓

贈張默君女士

佳人自南國習禮亦明詩海內多君子春風正好時

八九兩年寓比京使館街七號作

次韻王石孫比京林湖茶樓二首

湖水一泓帶遠天高林清影落尊前桃花笑識春風面共說今年似去年

繁華今豈似開天五載胡塵滿眼前碧草明湖舊相識落花時節遇龜年

湖心有島樹參天百尺酒樓綠水前桃李送春飛片片佳人拾翠自年年

八年春汪袞甫赴瑞士創設駐使此邦山水旣佳交涉復簡袞甫以如彼詩才大可放浪湖山恣情吟詠前去書詢其近作九月朔得報寫四十字酌之

廿載存知已天涯有報書江山真得助著作近何如大雅吾衰久  
西風葉落初名湖起秋水渺渺獨愁予

次韵孟仁秋夜見懷並示穎甥

一書四十日遠寄早秋天疇昔聯長句風塵又幾年夜分清興發  
詩就嫩茶煎問訊謝家女相思誰不然穎甥自四月于歸後迄無書來

遙憶

遙憶故園菊清秋應早開天涯重九日家信不時來詩酒新知少  
霜風短鬢催長沙卑濕地誰問洛陽才

新秋

幾日瀟瀟雨颯然秋已來故鄉應見菊海外獨登臺黃葉看時落  
野花寒尚開白頭隨幕府慷慨有餘哀

早起

早起喜新晴日色動高樹猶濕前夜雨初開朝來霧颯然西風秋  
嚴霜已結露捷足當要津流俗多攀附方枘入圓鑿宜與當世忤  
不受衆人憐終爲才名誤知己千古事感恩非知遇薄俗不能厚  
新交那如故時爲奴僕欺長逢長官怒秋色從西來帝鄉在何處  
天寒木葉下風高鴻雁去淨洗腸內熱頗得冷中趣君子能固窮  
勿寧改吾素

拙宦

拙宦已知人共棄高文空有筆如椽兩隨漢節依嚴武一任長官  
罵鄭虔寒菊秋來無限好浮名身後可能全西風吹落淮南葉招  
隱欲吟叢桂篇

幼子孟秋天於九月是子生於七年九月命名孟秋適成讖  
也

去年孟秋來肇錫汝嘉名今年孟秋去有如鴻毛輕入世未及暮

卷二  
九  
胡爲有此生亦知死爲歸生人若遠行形骸吾桎梏心意如甲兵  
昂藏七尺軀是非與辱榮迫此桑榆景乃見朝日傾潘岳瘞路側  
子夏哭喪明在昔賢與達未忘常人情遺像猶挂壁皎然玉樹清  
猶如識阿爹美目笑相迎生別曾幾日人鬼遂異程

幼子

幼子既死別愛妾復生離死者今已矣生者長相思  
悼亡百事哀涕淚從中來況有秋風勁絲絲白髮催  
生子人所喜時窮那能爾嗷嗷八口家添丁不如死  
人生電影過哀樂何其多悲憤填胸臆對酒不能歌  
七十古來稀四十堪息機廿年悲與歡化爲白雲飛  
水斷還復流美酒不解愁堂陰樹萱草煩憂上心頭  
太上能忘情烈士或殉名蘭膏白煎熬風水相激鳴

同氣

同氣相感召龍虎風雲從士爲知己死女爲悅己容  
諸侯無揖客參軍慢府主魏祖怨禰衡嚴武殺杜甫  
太行九折坂老驥服鹽車伯樂不相遇鞭死竟何如  
前倨季子嫂求去買臣妻金石有時變桃李下成蹊  
能詩卓文君高抗相如文白頭與長門茂陵女何云  
不同心如面背憎詩人詆暗中下井石甘言猶如薺

直欲

直欲同生死無心辨聖狂詩從閒裏得情到別時長舊事迷殘夢  
新交欲久忘莫將明鏡照頭上有秋霜

朱貫微贈照像以拙照還贈題四十字

氣宇眞清朗光風滿素書欲留佳士影長伴野人居曼倩題詞未  
平原刺繡初不堪還手贈白髮日蕭疏

巴黎和會告竣送王石孫東歸

大陸五年兵氣銷人人喜覩天下泰西歐上都執牛耳萬國諸侯  
皆來會漢使幕府多英俊就中王郎才名大縱橫欲說秦聯晉強  
弱可憐楚敵蔡筆陣舌戰劇戈鋌畫麟沐猴好冠帶漢陽諸姬終  
爲菹五霸雄長真無賴七日立向秦廷哭萬里重整東歸旆成事  
那補亡羊牢沈疴未蓄三年艾公子滄溟釣巨鼈詞客江上鱸魚  
膾吁嗟乎去冬遇君西海西今冬相送東海外陽關三疊淚盈把  
雲愁風蕭生秋籟

附擬改王石孫次韵巴黎和會告竣送東歸詩

石孫屢以所作相商權僭就其和作加以點竄續鳧斷鶴  
面目已非本來後生前賢流傳有嫌嗤點竄恐畫工使王  
嬭含冤東鄰爲西施增醜也顧石孫不但恕其狂妄且許  
附諸篇末可謂雅量已

我是東方傷心人欲俟河清周道秦男兒報國有熱血斯世莽蕩



無佳會弱者魚肉強者食五霸爭長夜郎大齊人取我汶上田欲  
問歸期無著蔡曲阜孔父降生地泰山嵯峨河縈帶有周禮樂空  
在魯王道煦嫗豈足賴祖帳東門來故人且聽新詩駐征旆儒生  
那有回天力况我消渴病未艾東望神州山河碎蓴菜秋風江南  
膾君爲長歌哭時艱好文積弱千年外明朝一葉滄海去怕聽驚  
濤起天籟

蘇蕙

蘇蕙錦文和淚織相如鳳曲入琴哀已拚當世無知己未有美人  
不愛才爲寄尺書青鳥至閒邀明月綺筵開年年歌舞春江上莫  
向前朝問劫灰

菊如歸自巴黎誌喜

暫爲十日別未及一葦廣何以如三秋地天隔泱泱青鳥日一至  
爲道長懷想夜夜離愁添爭似春潮長快乘浮雲驄西歸趁朝沈

向夕蘭渚東到家見月朗廚下菰米熟靜室鑪烟上何以訴相思  
新詩金玉響

有情

有情未覺浮生夢無命頻揚恨海波望帝傷春鶻泣血黃姑惜別  
鵲填河舊交欲盡新尤少來日難期去更多司馬長卿詞賦好茂  
陵秋雨病如何

張燕南以留別王石孫詩見示並論及拙作次韵酌之

光宣以降斯文盡那復建安七子賢十載風塵逢故舊三朝翰墨  
有因緣草玄揚氏羞能賦顧曲周郎知誤絃未與細論還惜別海  
天雲樹日綿綿

次韵孟仁見答

百川朝東海鳴鳳集茂林故國文章在李杜山斗欽自昔大雅作  
百代相招尋含咀太玄味薺苦茶或甘景行仰山高修纒汲井深

夏聲大而遠宏發萬籟瘖蒼梧有白雲倦飛思故岑西風海上來  
泠然一披襟清商振逸響白髮違朝簪之子不可見萬里共秋吟  
尊酒平生意時事百年心真摯懷蘇李辛苦追何陰健筆多婀娜  
清詞起衰沈胡爲哀以思所傷亂世音戎馬滿中原十年載驟駸  
天狼若可誅馳檄學陳琳勗哉歲寒節三字古人箴

附孟仁見答

堅冰厚裂地朔風號北林之子隔廖廓我心長欽欽南北尙離  
析敵釁日相尋青苗貸無人而以鳩自甘哀哀蒸民艱火熱水  
益深割鬻作虎養被噬尤當瘖寧問狐狸輩結託依嶽岑何如  
浮海遊飄然滌煩襟塵氛漸銷歇歌舞雜華簪韶光悅淑性浩  
蕩發謳吟大隱無所擇魏闕江海心龍躍或在淵鶴鳴乃於陰  
物有自殊趣隨化飛與沈萬里玄溟鴻東歸懷好音改火書始  
達代序何駸駸愧無明月珠遠持報瑤琳歲寒不改節一言以

爲箴

居易齋詩存卷三

九年夏移居後作 13 RUE ORTELIUS BRUXELLES

大梁靳志

新居

故鄉半畝園藝花兼梨棗開落隨歲時陰晴變昏曉貧家無鼎食  
藜藿臣朔飽盧家婦無愁頗亦習文藻每爲具斗酒任我玉山倒  
漢節河源遠幕府賓客老海鷗疑不妨鸞鳩笑亦好中原多兵氣  
世路莽浩浩暫棲烏鵲枝坐觀塵寰擾都市多樓居飛棟逼清昊  
檐前一弓地日過駒隙小一從瑤池宴又貯金屋嬌相如方病免  
文君愛遺稿每把定情詩視爲太玄草我誦白頭吟負信心如擣  
賞新喜嬋娟懷舊傷枯槁歌哭醒亦夢今昔鴻印爪到處盡爲家  
歡娛苦不早

比京瑪利路易司公園三首

SQUARE MARIE-LOUISE BRUXELLES 去新居不過數武

澄潭十頃周以山石花木夏日可以垂釣

都市紅塵裏池塘碧水迴深林花自落靜日鳥頻來驟雨鳧鷗亂  
夕陽烟樹開釣竿垂未得魚我莫相猜

何必覓滄洲王城百事幽鳥鳴山果熟鷺浴浪花浮草色連沙岸  
雲陰壓市樓陂塘三日雨六月已驚秋

花草有生意風潭亦自波市聲塵外遠樹色雨中多蹙浪大魚出  
窺人飛鳥過鏡湖三百里彷彿採菱歌

孟仁贈詩集四種淵明右丞蘇州樊川暨家藏昌黎東坡兩

集由瞿希馬便帶來比並允續寄孟襄陽各種作詩謝之  
一從王迹熄詩亡今古傷五言始蘇李魏晉揚清光江左少風骨  
綺靡悲齊梁沈宋始復古開國見有唐李杜大家體日月光焰長  
蔚爲一代宗雅頌今再昌學詩我生晚窮年涉獵忙嘗偕鄭廣文

高歌論興亡十年居西歐六度越重洋客中苦無書陳篇多遺忘  
感君贈百卷滿載渡海航發硯新刻本蠹蝕舊家藏蘇州晚年作  
樊川考功郎王孟有陶意韓蘇湖海強網羅數十家縑緜如堵牆  
長日對古人欲共凌風翔江山多奇氣撐觸詩人腸揮灑起風雨  
咳唾皆琳琅刻畫人物狀百怪倏在旁豈因窮後工坎珂益激昂  
那得昌黎翅捕逐出入荒愧少錦繡段報答君子堂長歌託高鳥  
萬里遙相望

夏日遊比京叢林湖上 AVENUE LOUISE, BOIS DE LA CA-

MBRE, CHALEF ROBINSON

比京城中市喧譁比京城西綠陰遮綠陰掩映十餘里下有馳道  
直不斜兩旁朱門起甲第五侯三貴爭驕奢車廻繡轂掣雷電馬  
齧金勒走龍蛇叢林當前倏無路左右轉去路更賒路轉林開清  
曠露爽氣來在水之涯隔水樹木更葱鬱湖心島嶼鋪白沙錦纜

牽舟夕陽渡妖姬當壚賣酒家猶憶西歐太平日少年意氣正春  
華清明上巳風日麗明珠翠羽顏如花陽九有厄龍失馭胡塵驚  
起城闕汙有人重整舊河山五年不踏明湖路臨水朱欄湖上亭  
連雲翠蓋湖邊樹鴿子趁人飲啄馴鴨頭泛綠顏色故遠林隱隱  
簫鼓來長夏遲遲風光暮武陵桃花不避秦曲江蒲柳先零露素  
衣久染京雒塵扁舟欲尋滄洲趣弔古重撫羊公石吟詩苦學陰  
鏗句漾陂棹謳錦帆開蘭亭觴詠名賢駐君不見兼旬暑雨秋水  
生漲痕已沒前度停船處

知己歎呈某君

人生四十不能獨立爲丈夫昂藏空有七尺軀晨起出門趨官府  
歸來彈鋏食無魚食客三千躐珠履未爲感恩况知己骨清不慣  
受人憐顏厚那能如俗鄙潦倒抱關大梁門長大佩劍淮陰市但  
使邂逅投意氣不惜慷慨許生死死容易知己難青眼高歌向



誰看

九年七月次韵汪袞甫聞內地有亂感賦

昔者有清亡龍戰黃海隈項城奮天戈四方諸侯來雄才資駕馭  
奔走無嫌猜中道片念差西南讎釁開可憐蓋才畧一旦霜露催  
至今過洄上感歎每祗徊東海文武資年輩相追陪受命離析後  
威靈委塵埃不戢兵猶火燎原水一杯中原堯封裂西域漢節回  
攬轡思澄清我馬正虺隤尾大那能掉况復坼三台狐鼠憑城社  
肘腋興雲雷何異螭蚌爭俱焚玉石哀安得并州快亂絲一剪裁  
飄零懷大樹悲風爲我迴

九年七月段曹交闈

項城昔失馭西南始兵凶中隳霸王業早悲祿命終英武難爲繼  
長厚黎元洪再燃勝朝灰都市戰血紅反正合肥段北上河間馮  
同室有戈戟大患在近攻天津養望久東山起謝公駿奔來多士

萬方謳歌同昭陵齊楚會大漢使節通或借縱橫術收取混一功  
折衝未易言尊俎變劍鋒扶桑日出國渡海來東封伏闕上書日  
悲憤貫白虹民氣那可遏防川勢益洶宸衷無獨斷聖德在謙沖  
軍國重大事咨岳每從容使問遍郡國言雜誰適從兵多將帥驕  
國瘠蛇豕封怏怏少主臣鑿鑿段元戎賜履芒在背犯座夢得熊  
昌言清君側稱戈成內訌諸侯壁上觀猛獸挺走窮江東八千人  
垓下困重瞳兵火終自焚所憂池魚空疊見亂兵入我家掖門東  
憑誰報平安目斷雙飛鴻

瞿希馬副領事之昂城任先下車舍下誌喜步其赴歐浮海

韻

鶯斯決起笑鵬搏落落風塵青眼看未免因人聊入幕已知拙宦  
強爲官驛通西極資章甫水到南湘多畹蘭可惜滄浪還濯足羞  
聞自古歎才難

十八年前京雒塵賈生最少賦過秦詩歌自是卿家事 文慎公有

超覽樓詩集 吏隱不妨物外身寶劍幾時氣見斗明珠未可夜投

人陳蕃榻下徐孺子爲愛使君席上珍

夏日偕希馬菊如文輅郊外遊覽

嗟我嬰世網官府奔走忙晨出至暮歸夏日炎炎長喜得半日閒  
步出城東廂十里郭外路蕭蕭多白楊平疇禾稼熟南畝方築場  
樹色見遠村水光漾廻塘清風自空至瀟灑塵慮忘曲徑入田家  
綠陰蓬戶涼客來驚雞犬日夕下牛羊兒童真太古跣行無完裳  
上樹摘梨棗勸我及新嘗偃息藉草坐顛倒盡壺觴藜藿有真味  
何如膏與梁笑樂顧儔侶良會殊未央蒼然暮色來車馬去皇皇

歐戰後遊藕絲塘弔古 OSTENDE

比利時如彈丸小兩大之間甌脫長提封百里盡北海大國英倫  
遙相望桑麻被野聞雞犬輶車接軫來冠裳可憐四衝必爭地終

爲西歐劇戰場一旅能雪會稽恥五年再觀東都光九死未僵見  
士氣大敵不怯真英王政和民安多暇豫王母宴向瑤池張瑤池  
俯臨衣袖海嘉名肇錫藕絲塘塘上離宮三十六中有華清溫泉  
湯明皇樂與下民共士女肩摩來相將五都大俠競豪富擣菹一  
擲百萬強趙女醉爲長夜舞海啣半輪月滿堂河山風景雖未改  
胡塵羶腥古難忘滄溟歛波干戈息故壘巍我秋草黃猶見折戟  
埋沙礫彷彿戰血殷夕陽泰山秦碑石磊磊河隄隋柳色蒼蒼人  
說魯陽戈迴日昨過蓬萊滄已桑君不見長鯨橫海不可射驚風  
雷雨倏忽在我旁

劉紫笙公使五旬壽詩

玉帛通西域聲華富石渠高張王母宴暫駐使君旛仗節歸朝日  
行年服政初竹林賢從後獻頌意何如

新秋自 OSTENDE 至 BLENKENBERGHE 與瞿希馬途中

聯句

廿里東塘路巾車作遠遊河山尋舊識仲景物起新愁戰骨沙場

滯希英雄霸業收人烟殷市井仲世事比蜉蝣豪富猶歌舞希閭

閻盡取求隋隄見楊柳仲宮井老梧楸隔岸魚謳晚希排空雁影

稠寒花明驛路仲蔓艸沒城樓田舍清溪曲希官橋古渡頭長風

催夢醒仲落日共雲浮裾屐偕良侶希星霜變舊丘平蕪連海綠

仲遠水接天流大澤魚鹽富希空村劫火留共爭秦鹿失仲獨抱

杞人憂故國方兵諫希他鄉學楚囚青袍羞白髮仲華袞誤金甌

靖節腰難折希班超筆可投乘時擊鷹隼仲伏櫪老驂騮房杜思

貞觀希夷齊耻暴周治絲貴刀斷仲止沸必薪抽失勢悲黃犬希

忘機羨白鷗碑傳羊叔子仲瓜種故秦侯屬國遲歸漢希新亭易

感秋澆愁憑濁酒仲垂釣弄扁舟明月來相引希清臆病欲瘳前

途見燈火仲孤鷺下汀洲携手河梁晚希驚心歲序悠可憐高李

輦仲同為稻梁謀空抱匡時略希誰煩借箸籌歲寒存本性仲吏  
隱亦潛脩休道輪蹄倦良宵更唱酌希

中秋陰雨無月寄玉如

我來如昨日再見秋葉黃明月幾回圓相隨天一方况復是中秋  
沈吟步東堂一年今宵多兩地共清光舉杯遙相屬欲與訴衷腸  
天風拂仙桂人間聞妙香微雨散如烟寒濕嫦娥裳羅襪暗塵生  
徘徊河漢長永夕竟不至相思淚浪浪海天碧雲斷清影落故鄉  
故鄉在何許菊老三徑荒盧家婦知愁懷人夜未央若憐閨中苦  
一為照空牀

中秋示瞿希馬

年年秋月白今夕不勝哀月是故鄉好秋從海上來無風黃葉落  
有客綠尊開欲插滿頭菊其如白髮催

張燕南同年隨使駐法量移日本贈照像為別以照像報之

輒題百字

漢使通西域風詩盛有唐上邦敦玉帛記室富文章班序聯鸚鵡  
言詞吐鳳凰華年歸屬國桂棹指扶桑鴻雪蓬萊認蟾宮翰墨香  
齊東朝日近越下暮雲長山水留清影芝蘭共晚芳九州蠻角鬪  
四十鬢毛蒼絲繡平原美名題曼倩狂臨歧得新句古錦好行囊  
比國海濱沙上偕希馬攝影題四十字

昔日同學友天涯有幾人再逢猶未老相對莫嫌真尊酒生平意  
池塘昨夜春留將鴻雪影好伴錦囊新

文輅暑假來依兩月秋初回柏林習醫約清明來會

汝來曾幾日相送意云何樹色今朝減天光入牖多秋花如作客  
湖水早生波此去加餐飯春風許再過

重九希馬來自昂城置酒賞菊菊如以其名菊請詩爲壽

朝來霜滿天昨夜風驚牖但覺秋氣清那知是重九白衣遠客來

送我黃花酒海外逢佳節兩載歸期負登高望三河中原橫潰久  
清江多魚鱗東園彫蒲柳可人淡如菊開向秋風後寸心冰雪清  
孤芳歲寒守桃李下成蹊零落今何有

重九憶北京

客中不復記重陽起視東籬夜有霜蓬鬢已霑秋色白菊花不似  
故園黃漢南楊柳先零露海上西風送早涼此日登高念遊子葡  
萄酒美鱗螯香

答希馬重九和詩仍疊前韻

雁聲南去斷衡陽弱羽猶霑塞上霜冷月欲圓向人白高林半落  
過牆黃宦情如水隨秋減鄉思昨宵入夢涼詞客哀時遇重九新  
詩無字不含香

疊寄懷袞甫韻送希馬赴瑞士兼呈袞甫

秦川舊公子名列荐賢書前席籌先借明湖錦不如楚筵辭醴意



海嶠挂帆初東閣梅先發清吟合憶予

袁甫次韵寄懷以志詩曾以鄭虔自况問近又遭罵否再疊

前韵答之

參軍輕府主欲續子荆書宦拙潘頻免行方史兩如茂陵多病後  
西候別人初信史留詩卷文章不負予

杜甫有王錄事許脩草堂費未到聊小詰詩戲效其體並用  
原韵簡示希馬盖自九月至今使費未至借貸度日已兩  
越月希馬赴瑞士任時曾借用二千佛望速還也

同病憐希馬貧無買酒資習聞從井義應念急難時

秋陰

誰云秋氣清今年秋陰匝十日九苦雨空濛散如霧豈是秋夜長  
秋窗不知曙晚起覺朝饑未午疑向暮太息陰陽錯兵氣暗天步

九年冬聞母病感賦五十韵

庚申十二月十日吾母行年七十歲嗟母二十始來歸庭戶喜氣  
生蘭蕙君子清芬遍鄉國主婦賢名照門第四德三從本儒風一  
女兩男俱早慧小男幼登金閨籍長女嫁得乘龍婿尊酒不空座  
客滿親友慕義下懷惠五十年來惟勤儉井臼親操問家計人謂  
餘福在其後積善之家宥百世黃金散盡不復來落落清門今淩  
替冷官羈棲孟津渡丘隴荒蕪不時祭側聞干祿足代耕弧矢欲  
騁四方志重譯遠尋海外州異俗新編職方記大廈將傾須人扶  
鉛刀發硎今可試民國草昧景運開項城延攬青雲致從容珥筆  
遊鳳池慷慨仗策隨漢使未及瓜期還相放應是才名當世忌茂  
陵臥病相如免宣室無徵賈生棄陟岵南望大梁雲歸家永悲新  
莊墜聖德或爲忠厚誤狷性肯逐錐刀利生平清白自矜喜身後  
禮數不完備治喪自昔稱家有儉葬那能恤時議青氈塵生書帷  
空宿草秋滋墓門閉板輿奉迎來上京上京春燥風日厲土音猶

操每思蜀新豐雖好不如沛重尋里門問耆舊獨向郎署久留滯  
鄭莊與母自此別相見實難黃泉易斛斯宅裏池鷗散王謝堂前  
梁燕逝金釵典盡藏書賣斗米明珠束薪桂破竈半空晨無烟布  
被不溫夜有淚西風原上鳴鵲鴿苦雨階前萎棠棣寡嫂驕豪厭  
糟糠諸孤伶仃失撫字可憐阮氏仲容賢十齡嶄嶄頭角異莊獄  
三年齊人語孔門六藝美錦製汝幼何怙天罔極我躬不閱家猶  
累窮途空扣帝閭哭長裾罷向侯門曳中原橫潰群雄分東山再  
出蒼生濟共慶王春攀龍鳳獨屏四夷禦魍魅尋河重上八月槎  
徙溟爰整西征轡浮雲一去門閭空高年常恐霜露墜採藤山上  
破鏡圓待時江汜小星擘呼爾從姑婦道修以媳代子家事治入  
厨作羹菽水供繞膝有孫竹馬戲晚節松筠猶強健暮景桑榆未  
顛顛遊子遲遲何來歸慈母泫泫不得意聞之自古憂傷人况經  
三秋夜無睡眠花猶作蠅頭書燈前細說平生事魂夢相接心屢

動風寒偶中病爲祟萊衣欲學嬰兒啼藥物安得殷勤侍新月本  
自東海出清光入窗照不寐嫦娥帶來平安信暫定驚魄息戰悸  
辛酉早春

正月放晴春已動小園向煖日初長舊詩未穩幾回改往事經年  
欲半忘覆地雜花坼新甲過牆好鳥噪斜陽東風無賴催人老惱  
殺南鄰黃四娘

辛酉辭職歸省汪袞使贈詩爲別六疊韵酌之

壯髮危冠白更稀堂陰萱草暖山扉倦隨漢使將王命未報春暉  
舞彩衣文字能題青玉簡驂騑寧受紫金鞵此生終爲才名誤十  
載升沈有是非

七十年華古所稀望兒日日倚荆扉貧惟詩卷隨行篋歸及春風  
換袷衣青鳥池桃王母壽白駒場藿故人鞿欲從菽水尋真味今  
是無勞問昨非

風塵滄海故人稀千里尺書尙欸扉爲有參軍慢府主因教遊子  
惜征衣陽關疊唱來相送馬首臨歧不可鞿歸漢子卿羞屬國應  
知四十四年非

已是曲高屬和稀驪駒戒路在巖扉機中心事傳文錦海上風塵  
染素衣白日青春還作伴詩名酒債偶相鞿掖門東畔花迎笑來  
者可追去者非

灞陵亭上白雲稀漫捲詩書更掩扉晚晚青春催客夢霏微花絮  
落人衣秋來故國鱸爲膾風滿一帆馬脫鞿頻唱渭城君勸酒翟  
公交態豈云非

滄溟浪闊去船稀欲卜歸期鵬入扉詩卷自書新稿本征裝重檢  
舊年衣時逢明主歲星下人說長繩白日鞿不見賈生今又久鬼  
神宣室事全非

注詩祝我歸應公府之聘

辛酉春留別比京舊居贈菊如

卜居未易一枝安絕國三年戴楚冠芳草綠催遊子去園花紅與  
後人看春風有意窺書幌家犬無心損藥欄化石望夫終不返古  
今信是別離難

贈別菊如

自昔有貞女望夫化爲石石頑詎知情點頭誠或格石堅不可轉  
心剛誰爲克前年與汝遇花紅長安陌相將來臨邛春入相如宅  
宅邊有隙地灌藝親手闢芝蘭取臭味萱草忘憂戚卷施抽心苦  
紅豆相思迫今年主人去對花空歎息明年花復開爲誰好顏色  
犬亦惜別離驚吠依我側天風吹海水來上胡商舶扶桑觀日出  
陽景崑崙隔獨憐落花多門前沒行迹

別比京舊居贈菊如

白雲無定住客舍一年安春至人將去花開夢已殘紅顏愁裏改  
青眼別時看獨惜霜根在經營閱歲寒

詠舊居梨花贈別菊如

相見時難別更難東風吹雪滿欄干芳心欲駐春無主香夢初成  
夜向闌散作白雲送君去憶隨明月入簾看素娥青女亦愁思十  
二瓊樓高且寒

十年春由印度洋歸國舟中作

印度洋舟上贈馬聚宜夫人 MADAME MAZUYER

海水澄如練明眸碧若琛澄波晚逾淨碧色看來深

法屬越南堤岸穗城高等小學校歌附序

歐戰後隨使節駐比於民國十年四月假歸省視道出西  
貢聞其附近堤岸地方華僑繁庶約三十萬人因偕香山  
劉君廷揚相過訪問村邑城鎮一如華夏不知身在海外  
也時炎天蒸熱通衢殷闐囂塵十丈頗思覓清涼處所暫  
遂憩息道旁見有廣場數畝周以欄柵蔭以棕竹中有學

子分列部伍練習步伐衣履鮮潔動轉應節因步入觀覽焉是爲法屬越南堤岸穗城學校操場也校長鶴山馮君燦喜國人遠來觀光也相迎致款曲引示校舍述建設原委蓋由廣肇公會出貲創建於民國元年聚廣肇人子弟而教之以國文歷史圖畫算術工藝法語體操各科命名爲穗城高等小學校學額約三百人半寄宿半外附講堂深邃宿舍整潔學生成績如圖畫陶器等籤分甲乙架度井然竊以爲僑民遠去鄉國營謀錐刀生養死葬經歷世代而法屬越南以無領事館之故國人來此者上岸及居留兩項科稅重疊即居留稅一項每人每年須繳納廿有七元痛苦不平呼籲無路溯自民國改元僑民喁喁內嚮樂輸重貲鼓動革命其愛國熱誠奮發踔厲如風靡草偃所有居留各地如瓜窪如南北美莫不奔走號召興學育



才若或恐後故十年來各處所設之國文官語學校森立  
繼長而成效蔚然可觀也然則堤岸者不過海外居留地  
中之一區而廣肇者又不過七帮僑民中之一帮而已穗  
城學校體操一科於兵式操外更注重中國槍刀劍戟拳  
棒各種古法及金革竹各軍樂盤錯筋骨發揚士氣頗得  
古人六藝游息之遺意而爲內地各學校所未能籌及者  
豈非所謂禮失求在野者耶馮校長以爲該校成立至今  
年適爲十週將刊布鴻篇以歌頌成績昭示來者請志綴  
以序言並繫之詩歌志自維綿薄既愧無力捐助學校基  
金尤愧不能戰勝敦槃爲海外同胞爭回權利至於僅以  
片言隻字稱道盛事使內地人士聞風嚮義蹶起而有以  
助之則情義所關責任斯在又何敢謙遜而辭謝乎驪歌  
載道征纜將解匆促執筆略述梗概並附以長歌焉時民

國十年五月三十一日也

西貢越南南半隅中有九十九灣之膏腴黃帝子孫桑爲弧瘴海  
西涉萬里餘娶婦育子起田廬養生送死與時俱君不見五嶺橫  
亘西江盤紆尉佗聲靈照番禺此間樂仍思蜀乎新豐應憶舊酒  
壚況有禮樂與典謨聖教時雨久霑濡今資章甫適越都鍛冶金  
鐵共洪鑪鬻宮巍峨臨通衢莘莘學子璉與瑚且向海外讀我書  
壯士本不耻爲儒人言東方有病夫當道豺狼狸與狐中原橫潰  
民其魚大厦將傾棟梁扶昂昂已識千里駒頭角崢嶸膽氣麤欲  
將崎嶇當坦途天池會到鵬南圖君不見神州佳氣無時無  
十年端午歸北京後作

某人像讚

東方謾世老氏同塵自古達者超邁等倫毀譽何在歌哭豈真無  
榮非辱惟屈乃申呼牛呼馬爲妾爲臣與人無忤隨時皆春舖糟

餒醜漁父之箴清濁分明屈原喪身去其鋒角平其怒嗔物來順  
受乃與道鄰

改小蘇贈詩

風塵幾度染征衣又逐青春緩緩歸大陸曾經滄海劫掖門重扣  
故園扉袖中詩卷年來富江上鱸魚秋正肥深巷未應覓車轍蓬  
蒿不剪吏人稀

愚叟在妓館召飲以八疊橫河詩丐韵示我輒步韵贈之

笑我西來海上鴻三年不到鳳城東生成姣好惟蘇小老去風流  
有謝公背讀新詩燈影畔喜聽清唱雨聲中大師說法天花下偶  
許心香一瓣通 妓有爲愚叟弟子者

荅橫河詩丐詩詢住趾兼示愚叟

五絃着手目飛鴻太史乘輶吾道東觀水纔經大瀛海爲文今見  
歐陽公三生夢覺青樓底百首詩成酒肆中相遇無須盡相識蓬

門車轍未曾通

十一年由美洲返京後作

壬戌元旦天未明入西苑門經寶光門赴集靈囿賀大總統

舊年

正月春王猶舊俗朝天騎馬入承明長林隱霧連瓊島夜雪添寒  
壓禁城三海樓臺依日近萬家爆竹作雷鳴岑參賈至盛唐詠況  
有新年景物清

梁伯強同年暨德配郝夫人六旬晉一雙壽

經義取士三百載癸卯甲辰殿其後西風東漸王迹熄大雅無聲  
吾衰久社稷爲重君爲輕官則臣僕民則后應是禮失求在野大  
瀛海外州有九傳子孰使變揖讓二三學子爲奔走善爲政者高  
自卑縣府道省風化首太行山接薊門西晉國聲靈今未朽煤鐵  
銅錫地寶富剛毅木訥民德厚暮年烈士愛桑梓鄉里少年敬耆

耆戎馬久亂堯封裂絃歌不輟武城守遼東如有百畝田欲與管  
寧爲耕耦先生本是賈誼流天下治安胸中有清議但使能震聵  
斧柯豈必再假手君家子弟盡英俊白眉最良與我友西歐上京  
會冠裳漢家將軍佩印綬當筵賦詩筆如椽生平朋知酒一斗東  
歸攜來滄海藥京華春風金飄柳雙雙椿萱蔭北堂賓來喜氣滿  
戶牖出言傾座見通家長揖登堂拜賢母高年真如南山松拙詩  
欲鳴秦人缶積善之家有餘慶靜者逢吉仁者壽

上已後三日家居臥病劉少相示以偕吳竹林遊公園詩走

筆次韻

家居方臥病細雨愁日暮劉侯遺我書召我詩中趣前夜東風入  
京國花無數帝王后土義苑囿遊人步萬株社壇栢盡是元時樹  
幾見朝市改歸然青陽駐御溝水活活宮鶯啼故故登臨懷往昔  
杖履欣追慕

清明後四日病起遊公園

臥病十餘日起見柳條青衿衣亦已換身輕風泠泠上已天氣佳  
寒食好雨零長冬如大夢東風吹又醒晴光浮草際旭日照窗櫺  
峰蝶近花亂鳥鳴時可聽長安千萬人車馬出郊坰顧我無蹇驢  
信步隨所經蔚然社稷壇林木覆園亭雙闕插霄漢金碧斬新劂  
御溝橋下水漾綠入迴汀有山不在高陂陀當戶扁雜花夾山徑  
十步九欲停柳絲繫落日樹杪明金鈴花氣和衣香煖欲醉仙醺  
沈疴倏若失昂首凌青冥悠悠出岫雲修修白鶴翎太和蕩百病  
屏棄參與苓

清明後五日再遊公園

靜中得佳趣病起自扶持杖履攜書去園林載酒隨竹籬斜倚石  
藕榭曲通池岸轉花迎笑隄長柳挽絲白砂鋪細路黃鳥過高枝  
日煖風來好雲陰雨亦宜遠山青靄合喬木夕陽遲草色遙看處

烟痕淡抹時偷閒常獨往乘興與人期松柏無情古經營欲憶誰  
十年朝市改百代社壇遺宮闕飛丹鳳階墀走翠螭御溝流恨水  
紅葉罷題詩棠樹猶留愛公園爲朱桂辛一手所經營花神合有  
祠四宜軒茶社本花神祠故趾惜已不存其舊危樓金瓦落斷碣  
碧苔滋駘蕩春何限登臨意在茲藩羊頻牴觸市虎費猜疑舉目  
新亭感巖城鼓角悲

早起遊公園

愁時又被春風惱病起却爲盡日遊芍藥新芽初破土杉松古色  
半遮樓北來爽氣橫瓊島東去蒼波出御溝大好燕京足形勝元  
明清是帝王州





